

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
OPĆINA NOVI GRAD SARAJEVO
Općinsko vijeće

Broj: 01-02-23678/25
Sarajevo, 02.12..2025. godine

OPĆINA NOVI GRAD SARAJEVO

OPĆINSKI NAČELNIK

PREDMET: Vijećnička pitanja i inicijative, dostavlja se

Na 11. radnoj sjednici Općinskog vijeća općinski vijećnici postavili su nekoliko vijećničkih pitanja odnosno pokrenuli su vijećničke inicijative sljedećeg sadržaja:

a) Vijećničke inicijative

- Vijećnik Jasmin Smječanin-

1. Pokrećem inicijativu za postavljenje natkrivenog autobusnog stajališta u ulici Smaila Šikala (autobuska okretaljka).
2. Pokrećem inicijativu za postavljanje sigurnosne kamere ispred ambulante u MZ „Alipašin most I“. Obrazloženje: Postavljanje navedene kamere potrebno je iz razloga jer se u blizinu nalazi pomoćni ulaz u OŠ „Umihana Čuvidina“ i učenici škole koriste taj ulaz, te radi njihove sigurnosti i bezbjednosti potrebna je nadzorna kamera.
3. Pokrećem inicijativu za postavljanje radara u ulici Safeta Zajke između kružnog toka na IX transferzali i kružnog toka u Brijesću.

-klub vijećnika SDA -

1. Inicijativa za postavljanje dva usporivača brzine sa pješačkim prelazima u ulici Adema Buće jedan usporivač na broju 370 a sledeci u nizu kod broja 422
Poštovani,
Obraćam Vam se s inicijativom za postavljanje dva usporivača brzine (ležeća policajca) sa obilježenim pješačkim prelazima u ulici Adema Buće.
Na pomenutom dijelu ulice saobraćaj je izrazito frekventan, a vozila se često kreću neprilagođenom brzinom, što predstavlja ozbiljnu opasnost za pješake, naročito djecu i starije osobe. U blizini se nalaze stambeni objekti, trgovine i autobuska stajališta, te je potreba za sigurnim prelaskom ulice svakodnevna.
Postavljanjem usporivača brzine sa jasno označenim pješačkim prelazima povećala bi se sigurnost svih učesnika u saobraćaju i smanjila mogućnost saobraćajnih nezgoda.
Molimo da nadležna služba razmotri ovu inicijativu i u skladu sa mogućnostima planira njenu realizaciju u što skorijem roku.
Unaprijed zahvaljujem na razumijevanju i očekujem pozitivan odgovor.

2. Podnosim inicijativu za hitno postavljanje dva usporivača saobraćaja u ulici Smaila Šikala, koja je nedavno rekonstruisana i puštena u upotrebu. Na navedenoj dionici svakodnevno se kreće veći broj djece koja idu u školu, kao i drugih pješaka. Nakon rekonstrukcije, primijećeno je da vozila ovom ulicom prolaze neprimjereno velikom brzinom, što predstavlja ozbiljan rizik po sigurnost stanovnika, posebno najmlađih. U cilju sprečavanja saobraćajnih nezgoda i povećanja sigurnosti svih učesnika u saobraćaju, molim da se:

- izvrši uvid na terenu,
- te da se postave dva široka usporivača saobraćaja na adekvatnim lokacijama, uz prateću saobraćajnu signalizaciju.

Ulaganje u sigurnost djece i lokalne zajednice treba biti prioritet, stoga očekujem da se ova inicijativa razmotri u što hitnijem roku.

3. Podnosim inicijativu da nadležne službe Općine Novi Grad Sarajevo hitno pristupe sanaciji odnosno rekonstrukciji ulice Nusreta Brkića br. 14 u Naselju heroja Sokolje.

Ulica se nalazi u izrazito lošem i dotrajalom stanju. Asfalt na kolovozu je vidno oštećen i puknut po sredini ceste, pri čemu su pukotine široke i do 5 cm, a pojedini dijelovi kolovoza su propali. Zbog ovakvog stanja, saobraćaj se odvija otežano, te se i vozači i pješaci kreću nesigurno, naročito tokom noći kada je vidljivost smanjena.

S obzirom na to da ovakvo stanje predstavlja rizik za sigurnost građana, molim nadležne općinske službe da hitno reaguju i u najkraćem roku pristupe sanaciji ovog dijela ulice.

2. Podnosim inicijativu da nadležne službe Općine Novi Grad Sarajevo uspostave redovno i sistematsko čišćenje šahtova i rešetki u ulicama Numan paše Ćuprilića i Zaima Imamovića u Naselju heroja Sokolje. Građani ovog područja redovno prijavljuju da, prilikom jačih padavina, navedene ulice često poplave zbog neredovnog održavanja i začepljenih šahtova i rešetki. Posljedica su otežano kretanje pješaka, šteta na vozilima i stvaranje dodatnih rizika za saobraćaj.

Stoga tražim da se u redovan plan održavanja komunalne infrastrukture uvrsti češće i blagovremeno čišćenje svih šahtova i rešetki na navedenim lokacijama, posebno u periodima intenzivnih padavina.

4. U ime Kluba SDA Novi Grad Sarajevo podnosim inicijativu za nastavak projekata Južne longitudinalne koji predstavlja jedan od strateški najznačajnijih infrastrukturnih projekata za područje Općine Novi Grad Sarajevo. Njegova realizacija, posebno u segmentu spajanja sa XII transferzalom i povezivanja na koridor 5C, ima direktan utjecaj na poboljšanje protočnosti saobraćaja, rasterećenje postojećih saobraćajnica i povećanje sigurnosti svih učesnika u saobraćaju.

Na navedenim dionicama svakodnevno se stvaraju izrazito velike i često nepodnošljive gužve, koje dodatno usporavaju kretanje stanovništva i negativno utiču na funkcionisanje saobraćaja u cijelom gradu. Posebno teška situacija evidentna je na pravcu od pekare AS u naselju Staro Hrasno pa sve do Aerodromske ulice, gdje se saobraćaj odvija otežano i uz dugotrajna zadržavanja.

Nastavak izgradnje Južne longitudinalne omogućio bi kvalitetnije i brže povezivanje sa ključnim saobraćajnim tokovima grada te bi predstavljao značajan iskorak u modernizaciji infrastrukture, smanjenju saobraćajnih gužvi i unapređenju kvaliteta života građana.

Prijedlog:

Predlaže se da nadležne institucije u što kraćem vremenskom periodu pristupe razmatranju svih preostalih koraka potrebnih za nastavak realizacije projekta, uključujući izradu potrebne dokumentacije, planiranje obezbjeđenje finansijskih sredstava kroz Budžet za 2026. godinu, te koordinaciju sa relevantnim kantonalnim i državnim organima.

5. Podnosim inicijativu, u ime Kluba SDA Novi Grad Sarajevo, da se u što kraćem roku pokrene procedura sanacije i rekonstrukcije ulice Ive Andrića, na dionici od početnog dijela ove saobraćajnice pa sve do spoja sa Južnom longitudinalom, te da se istovremeno planira i izgradnja kružnog toka koji bi trajno riješio izrazite saobraćajne probleme na ovom području.

Ulica Ive Andrića predstavlja jednu od ključnih i najfrekventnijih saobraćajnica na prostoru Općine Novi Grad Sarajevo. Stanje kolovoza na većem dijelu ove dionice je u značajnoj mjeri oštećeno, što otežava i usporava normalno odvijanje saobraćaja, a u određenim segmentima utiče i na sigurnost svih učesnika u saobraćaju.

Najveći problem, međutim, predstavlja saobraćajno čvorište na kraju ulice Ive Andrića, u zoni povezivanja sa Južnom longitudinalom, gdje se svakodnevno stvaraju izrazito velike gužve i saobraćajni čepovi. Ova tačka spajanja je dugogodišnja kritična tačka u saobraćajnoj mreži, jer se na njemu susreću i spajaju tri velika gradska područja:

- Alipašino Polje – B faza
- Alipašino Polje – C faza
- Mojmilo
- Saraj Polje

Izgradnjom kružnog toka na ovom mjestu uspostavio bi se protočan i znatno sigurniji tok vozila, čime bi se riješio jedan od najizraženijih saobraćajnih problema u ovom dijelu općine. Modernizacija ove dionice bi imala direktan pozitivan uticaj na svakodnevni život velikog broja građana, smanjila bi vrijeme putovanja, poboljšala sigurnost i doprinijela boljoj povezanosti ovih naselja.

Prijedlog

Predlažemo da se:

1.Sanacija i rekonstrukcija ulice Ive Andrića, uključujući rješavanje cjelokupne dionice prema Južnoj longitudinali, te

2.Izgradnja kružnog toka na terminalnom dijelu ove ulice,

uvrste u Budžet Općine Novi Grad Sarajevo za 2026. godinu, zajedno sa izradom projektne dokumentacije i planiranjem potrebnih finansijskih sredstava.

S obzirom na dugogodišnji karakter problema, izuzetnu frekvenciju ove saobraćajnice i direktan utjecaj na veliki broj stanovnika Novog Grada, Klub SDA Novi Grad Sarajevo smatra da je neophodno da se navedena inicijativa razmotri prioritarno i da se uvrsti u planske dokumente Općine za 2026. godinu.

6. Hitna zamjena starih i dotrajalih rasvjetnih tijela u naselju Alipašino Polje, B faza – u ulicama iza Semira Frašte i Nerkeza Smailagića.

Poštovani,

Podnosim inicijativu da se u naselju Alipašino polje B faza, u ulicama iza Semira Frašte i Nerkeza Smailagića, zamijene rasvjetna tijela koja nikada nisu zamijenjena savremenim i adekvatnim svjetiljkama. Postojeća javna rasvjeta je izrazito slaba, prigušena i nedovoljna da osigura osnovne uslove sigurnosti u noćnim satima. Zbog nedostatka kvalitetne osvijetljenosti, mještani se često suočavaju s pojavama vandalizma i drugim negativnim dešavanjima tokom noći, što dodatno narušava osjećaj sigurnosti stanovnika ovog dijela naselja.

Stoga predlažem da se nadležna služba Općine hitno uključi u realizaciju zamjene zastarjele rasvjete novim, energetski efikasnim i snažnijim rasvjetnim tijelima, kako bi se unaprijedila sigurnost, vidljivost i kvalitet života stanovnika Alipašinog Polja B faza.

Molim nadležne službe da se inicijativa razmotri u najkraćem mogućem roku i da se pokrene procedura za realizaciju predloženog rješenja.

7. Vijećničko pitanje - Sigurnosna situacija na području Općine Novi Grad Sarajevo

Poštovani,

U više općina Kantona Sarajevo (Centar, Ilidža, Stari Grad i Vogošća) redovno se provode koordinacije i zajedničke aktivnosti sa MUP-om KS, policijskim stanicama i općinskim službama s ciljem poboljšanja ukupnog sigurnosnog ambijenta, uključujući identifikaciju „crnih tačaka“, pojačano patroliranje, jačanje rasvjete, postavljanje videonadzora i preventivne programe za lokalnu zajednicu.

Na području Općine Novi Grad Sarajevo građani iz više mjesnih zajednica proteklih mjeseci kontinuirano se obraćaju vijećnicima zbog učestalih slučajeva narušavanja javnog reda i mira, vandalizma, oštećivanja imovine, krađa te nesigurnih javnih površina. Prema informacijama koje dolaze

s terena, situacija se ne smiruje, nego dodatno eskalira iz mjeseca u mjesec, što povećava osjećaj nesigurnosti kod stanovnika, posebno u večernjim satima i na slabije osvijetljenim lokacijama.

S tim u vezi, molim da mi se dostavi sveobuhvatna informacija:

1. Da li Općina Novi Grad Sarajevo provodi redovne sastanke i koordinacije s Policijskom upravom Novi Grad i drugim nadležnim institucijama po pitanju sigurnosne situacije u lokalnim zajednicama?
2. Da li postoji zvanična evidencija rizičnih i problematičnih lokacija ("crnih tačaka") po mjesnim zajednicama, te može li se ista dostaviti?
3. Koje su konkretne mjere u prethodnih 12 mjeseci poduzete radi poboljšanja sigurnosti i da li su podaci o tim mjerama javno dostupni?
4. Da li je planirana izrada ili ažuriranje općinskog Plana sigurnosti, po uzoru na prakse drugih općina KS?
5. Da li Općina planira pojačati intervencije poput dopune rasvjete, postavljanja kamera, uređenja zapuštenih površina i povećanja saradnje s MUP-om KS, kako bi se spriječila daljnja eskalacija sigurnosnih incidenata?

8. Inicijativa za uklanjanjem havarisanih i neregistrovanih vozila sa javnih parking prostora na području Općine Novi Grad Sarajevo

Poštovani,

U pojedinim mjesnim zajednicama Općine Novi Grad Sarajevo duži vremenski period prisutan je problem havarisanih i neregistrovanih motornih vozila koja zauzimaju javne parking površine. Prethodno je u jednoj mjesnoj zajednici već bilo pokrenuto pitanje uklanjanja ovakvih vozila, uz napomenu da je za rješavanje problema potrebna koordinacija između Općine, MUP-a Kantona Sarajevo i KJKP "Rad".

Međutim, građani iz više drugih mjesnih zajednica nastavljaju ukazivati na isti problem, navodeći konkretne lokacije na kojima vozila mjesecima stoje neuklonjena.

S tim u vezi, molim da mi se dostavi informacija:

1. Da li je Općina Novi Grad Sarajevo započela aktivnosti na uklanjanju havarisanih i neregistrovanih vozila u bilo kojoj mjesnoj zajednici nakon ranije pokrenutog pitanja?
2. Ukoliko jeste, koje mjere su poduzete i na kojim lokacijama?
3. Ukoliko nije, koji su razlozi te da li se planira sveobuhvatno rješavanje ovog problema na nivou cijele općine?
4. Da li postoji plan da se u saradnji sa MUP-om KS i KJKP "Rad" uradi pregled stanja po svim mjesnim zajednicama i utvrdi dinamika uklanjanja ovakvih vozila?

9. Vijećničko pitanje - Sigurnosna situacija na području Općine Novi Grad Sarajevo

Poštovani,

Stanovnici ulica Zahira Panjete i Bana Mateje Ninoslava, koje se nalaze neposredno uz administrativnu granicu dvije općine, već duži niz godina suočavaju se sa ozbiljnim problemima u vezi sa organizacijom odlaganja komunalnog otpada. Iako je nedavno u jednom dijelu ulice Zahira Panjete, koji pripada Općini Novo Sarajevo, postavljeno nekoliko PVC kanti čime je riješen dugogodišnji problem odlaganja smeća za tamošnje stanovnike, građani jasno ističu da je problem samo djelimično riješen.

Drugi dio iste ulice, onaj koji pripada Općini Novi Grad i koji se spaja sa ulicom Bana Mateje Ninoslava, i dalje nema postavljene PVC kante niti organizirano mjesto za odlaganje otpada. Zbog toga su stanovnici primorani odlagati smeće uz potporne zidove, u improvizovanim vrećama ili na neadekvatnim površinama, što privlači životinje, stvara neugodne mirise, narušava higijenske uslove i predstavlja ozbiljan rizik po zdravlje i sigurnost stanovništva.

Građani ukazuju da se nalaze u specifičnoj situaciji jer žive tačno na granici dvije općine, što je dovelo do toga da se problem godinama nije rješavao. U svojim obraćanjima vijećnicima naglašavaju važnost brzog reagovanja nadležnih službi, navodeći da je organizovano odlaganje i odvoz smeća neophodan minimum za normalan život. Također ističu da je redovno odlaganje i plaćanje komunalnih usluga bitno i zbog postupaka legalizacije objekata, gdje je upravo dokaz o plaćanju komunalija jedan od potrebnih uslova.

S obzirom na sve navedeno, kao i činjenicu da su se stanovnici ovih ulica više puta obraćali očekujući rješavanje problema koji direktno utiče na svakodnevni život, podnosim sljedeću inicijativu:

Predlažem da Općina Novi Grad Sarajevo, u saradnji sa nadležnim komunalnim preduzećem, izvrši postavljanje potrebnog broja PVC kanti za komunalni otpad u dijelu ulice koji pripada Općini Novi Grad, te da se uspostavi redovan sistem odvoza otpada. Na ovaj način osigurao bi se jednak tretman svih stanovnika naselja, spriječilo daljnje gomilanje otpada na neadekvatnim mjestima i unaprijedila higijena, sigurnost i vizuelni izgled cijelog područja.

Stanovnici navedenih ulica izrazili su povjerenje u institucije i nadu da će ovaj problem, koji se tiče osnovnih životnih uslova, konačno biti riješen.

Molim da se inicijativa prihvati i proslijedi nadležnim službama radi realizacije.

10. INICIJATIVA za preimenovanje Edukativnog centra Javne ustanove „Memorijalni centar Sarajevo“

u Edukativni centar „Arifović Medžid“

Obrazloženje:

Edukativni centar Javne ustanove „Memorijalni centar Sarajevo“ nalazi se na području Općine Novi Grad Sarajevo, u naselju Dobrinja – mjestu od posebnog značaja za historiju odbrane glavnog grada Bosne i Hercegovine.

Šehid Arifović Medžid, rođen 26. novembra 1964. godine, a poginuo 17. juna 1993. godine, bio je pripadnik Armije Republike Bosne i Hercegovine, i to Pete motorizovane brigade. Tokom agresije na Bosnu i Hercegovinu, bio je raspoređen na poslovima kopanja Tunela spasa D–B, koji je postao simbol otpora, nade i opstanka opkoljenog Sarajeva.

U obavljanju tih izuzetno rizičnih zadataka, Arifović Medžid je poginuo prilikom izvođenja radova na izgradnji Tunela spasa, dajući svoj život u njegovim temeljima. Bio je jedini kopač koji je poginuo tokom izgradnje Tunela spasa, čime je njegovo ime trajno upisano u historiju otpora i slobode Sarajeva. Za pokazanu hrabrost, odanost i doprinos odbrani Bosne i Hercegovine, odlikovan je najvišim ratnim priznanjem – Zlatnim ljiljanom. Njegova žrtva simbolizira hrabrost, odlučnost i nesebičnost boraca koji su, u najtežim trenucima, branili Sarajevo i Bosnu i Hercegovinu.

Imajući u vidu moralnu, simboličku i historijsku vrijednost njegovog čina, Klub vijećnika Stranke demokratske akcije u Općinskom vijeću Novi Grad Sarajevo podnosi ovu inicijativu i predlaže da se, u znak trajnog sjećanja i zahvalnosti, Edukativni centar Javne ustanove „Memorijalni centar Sarajevo“ preimenuje u „Edukativni centar Arifović Medžid“.

Na taj način bi se trajno sačuvalo sjećanje na heroja čija je žrtva doslovno ugrađena u temelje Tunela spasa i slobode Sarajeva.

Inicijativa se upućuje: Skupštini Kantona Sarajevo, Ministarstvu za boračka pitanja Kantona Sarajevo. Istovremeno, tražimo da se na upućenu inicijativu dostavi odgovor, te da se, ukoliko postoji potreba, o istoj raspravlja na sjednici Skupštine Kantona Sarajevo.

11. Zahtjev za hitnu sanaciju i zamjenu vodovodne cijevi te čišćenje rigola u ulici Butilska (od broja 92 do 120)

Poštovani,

Klub vijećnika SDA u Općinskom vijeću Novi Grad Sarajevo upućuje inicijativu prema nadležnoj službi da, u skladu sa svojim ovlaštenjima, poduzme hitne mjere na sanaciji infrastrukturnih problema u ulici Butilska, i to na dionici od broja 92 do 120.

Na ovoj lokaciji već duži period dolazi do učestalih kvarova, pucanja cijevi i naknadnih popravki, što stvara probleme stanovnicima, ugrožava stabilnost kolovozne konstrukcije te povećava rizik od daljnjih oštećenja.

S tim u vezi, predlažemo i tražimo:

1. Potpunu zamjenu vodovodne cijevi u dužini od cca 100 metara na navedenoj dionici, kako bi se trajno otklonili kvarovi i osigurao stabilan i pouzdan vodovodni sistem.

2. Čišćenje i uređenje rigola uz cestu, koji su trenutno u potpunosti zatrpani i suženi, što dodatno otežava odvodnju i može dovesti do oštećenja kolovoza i okolnih površina.

Ovaj zahvat je neophodan radi zaštite infrastrukture, sigurnosti stanovnika te kvalitetnog funkcionisanja vodovodnog sistema i odvodnje.

Molimo da nadležna služba u što kraćem roku izađe na teren, izvrši pregled i poduzme potrebne aktivnosti u skladu sa svojom nadležnošću.

Također, tražimo da nam se dostavi pisani odgovor o poduzetim radnjama i planiranim aktivnostima po ovoj inicijativi.

12. INICIJATIVA: Zahtjev za inspekcijski nadzor i uklanjanje uzurpacije državnog zemljišta u ulici Butilska (kod broja 34)

Klub vijećnika SDA u Općinskom vijeću Novi Grad Sarajevo upućuje inicijativu prema nadležnim službama da, u skladu sa svojim ovlaštenjima, izvrše hitan uviđaj i poduzmu mjere na uklanjanju uzurpacije državnog zemljišta u ulici Butilska, u neposrednoj blizini broja 34.

Na predmetnoj lokaciji došlo je do sužavanja ulice uslijed postavljanja ograde na državnom zemljištu, čime je došlo do uzurpacije javne površine i onemogućavanja normalnog odvijanja saobraćaja.

Zbog suženja kolovoza postoji ozbiljna opasnost po sigurnost učesnika u saobraćaju, posebno s obzirom na činjenicu da se navedeni put svakodnevno koristi te da u aktuelnom stanju postoji povećan rizik od saobraćajne nezgode.

S tim u vezi, predlažemo i tražimo:

1. Hitno izlazak inspekcije na teren i utvrđivanje činjeničnog stanja.
2. Provjeru međa i granica državnog zemljišta na navedenoj dionici.
3. Naređenje uklanjanja ili pomjeranja sporne ograde, ukoliko se utvrdi da se nalazi na javnoj površini / državnom zemljištu.
4. Poduzimanje svih zakonom propisanih mjera protiv eventualnog uzurpatora.

Molimo da se u što kraćem roku izvrši uviđaj i poduzmu sve radnje iz nadležnosti kako bi se navedeni problem otklonio i saobraćajna sigurnost vratila na zadovoljavajući nivo.

Također zahtijevamo da nam se dostavi pisani odgovor o poduzetim aktivnostima i planiranim mjerama po ovoj inicijativi.

13. INICIJATIVA prema nadležnoj općinskoj službi

U ime Kluba SDA u Općinskom vijeću Novi Grad Sarajevo podnosimo inicijativu za hitno poduzimanje mjera s ciljem povećanja sigurnosti pješaka, posebno učenika, u ulici koja povezuje naselja Zabrđe i Sokolje, a kojom se svakodnevno kreće veliki broj djece i stanovnika.

Na većem dijelu ove ulice ne postoji izgrađena pješačka staza, niti su obilježeni pješački prelazi, što ozbiljno ugrožava sigurnost pješaka. Dodatno zabrinjava činjenica da se ovom dionicom svakodnevno kreću učenici Osnovne škole "Sokolje", a evidentirano je i više slučajeva povređivanja pješaka od strane motornih vozila.

U blizini škole postavljen je samo jedan ležeći policajac, koji se pokazao nedovoljnim u usporavanju saobraćaja, pa je potreban sveobuhvatniji pristup rješavanju ovog problema.

S tim u vezi, predlažemo i tražimo da se:

Postavi odgovarajuća horizontalna i vertikalna saobraćajna signalizacija, uključujući obilježavanje pješačkih prelaza

Ugradi dodatni ležeći policajci ili druge mjere za smirivanje saobraćaja duž ulice, a posebno u zoni škole;

Izvrši stručna procjena sigurnosnih rizika i da nadležna služba u skladu s tim hitno poduzme potrebne mjere.

Cilj ove inicijative je zaštita djece i svih pješaka, te osiguravanje sigurnijih uslova kretanja u jednoj od najfrekventnijih ulica između Zabrđa i Sokolja.

14. INICIJATIVA u ime Kluba SDA u Općinskom vijeću Novi Grad Sarajevo podnosim inicijativu za postavljanje saobraćajnog ogledala u Butilskoj ulici, na lokaciji između brojeva 151 i 153.

Na navedenom dijelu ulice preglednost je izrazito slaba, što otežava bezbjedan izlaz vozila na kolovoz i povećava rizik od saobraćajnih nezgoda. Postavljanje saobraćajnog ogledala doprinijet će boljoj vidljivosti, većoj sigurnosti svih učesnika u saobraćaju i smanjenju mogućnosti neželjenih situacija. S tim u vezi, molimo nadležnu službu da izvrši pregled lokacije i pristupi ugradnji saobraćajnog ogledala u što kraćem roku.

15. Vijećnička inicijativa – Uvođenje hitnih mjera povećanja sigurnosti u ulici Adema Buće

Poštovani,

Stanovnici ulice Adema Buće, naročito u dijelu kod Apoteke Sarajevo i tzv. Šarene zgrade, već duži vremenski period suočavaju se sa ozbiljno narušenom sigurnošću saobraćaja. Na ovom mjestu nalazi se izrazito frekventan pješački prijelaz koji svakodnevno koriste djeca, učenici, roditelji, starije osobe i veliki broj stanovnika okolnih zgrada.

Građani ukazuju da se vozila na ovom dijelu kreću neprilagođenom i često prekomjernom brzinom, zbog čega pješaci moraju dugo čekati kako bi bezbjedno prešli ulicu, ili su primorani da pretrčavaju kolovoz, čime se direktno ugrožava njihova sigurnost. Problem dodatno pogoršava činjenica da na navedenoj lokaciji ne postoji nijedno sredstvo za smanjenje brzine, nema ležećih policajaca, radarske kontrole niti video-nadzora.

Stanovnici skreću pažnju i na to da je uključ enje iz sporednih ulica u glavnu saobraćajnicu izuzetno otežano, zbog gustog saobraćaja i velikih brzina vozila na glavnoj cesti. Vozači često moraju dugo čekati ili se izlagati riziku prilikom uključivanja, što povećava mogućnost sudara i opasnih situacija.

Na ovom dijelu zabilježeni su brojni saobraćajni incidenti, uključujući i slučajeve povrijeđene djece, dok je nedavni težak slučaj stradanja djeteta dodatno uznemirio lokalnu zajednicu i ukazao na urgentnost djelovanja. Prema informacijama stanovnika, već je pokrenuta i potpisana peticija kojom se zahtijeva hitna intervencija nadležnih službi.

Imajući u vidu sve navedeno, podnosim sljedeću inicijativu:

Predlažem da Općina Novi Grad Sarajevo, u saradnji sa nadležnim službama i institucijama, hitno pokrene proceduru za:

- 1.postavljanje usporivača brzine (ležećih policajaca) ili drugih fizičkih prepreka za smanjenje brzine vozila u ulici Adema Buće,
- 2.uvođenje radarske kontrole ili video-nadzora radi suzbijanja neprilagođene brzine i povećanja nadzora,
- 3.dodatno označavanje i osvjetljavanje pješačkog prijelaza, radi bolje vidljivosti i sigurnosti pješaka,
- 4.preispitivanje regulacije saobraćaja radi omogućavanja sigurnijeg uključivanja vozila iz sporednih ulica.

Ove mjere su nužne kako bi se spriječile nove nesreće i osiguralo sigurno kretanje svih učesnika u saobraćaju, posebno djece i starijih osoba.

Molim da se inicijativa razmotri i prosljedi nadležnim službama na postupanje.

-vijećnik Adis Šahmanija -

1.Podnosim INICIJATIVU ZA POOŠTRENJE MJERA PREMA NAVIJAČKIM SKUPINAMA U FBIH

Polazeći od sve učestalijih napada na maloljetnike, fizičkih obračuna, oduzimanja ličnih stvari i otvorenog vršenja nasilja na ulicama kantona u FBiH, pokrećem inicijativu za hitno pooštavanje mjera prema navijačkim skupinama i neformalnim podgrupama koje djeluju mimo zakona, bez ikakve kontrole i bez ikakve odgovornosti.

U posljednjih nekoliko mjeseci svjedočimo brutalnim napadima na tinejdžere koji nose obilježja “pogrešnog” kluba. Djeca od 13, 14 i 15 godina postaju mete organizovanih napada, presretanja automobilima, fizičkog nasilja i pljačkanja. Umjesto sigurnosti – roditelji dobijaju poruke da je “to normalno danas”. To nije normalno. To je opasno, kriminalno i predstavlja otvoren javni sigurnosni problem.

Insistiramo da institucije FBiH i kantona hitno usvoje sljedeće mjere:

1. Uvođenje zakonskih kazni za navijačko nasilje – svako fizičko nasilje, pljačka, oduzimanje obilježja ili napad iz "navijačkog motiva" mora imati obavezne minimalne kazne zatvora, bez mogućnosti prekršajnog tretmana.
2. Krivična odgovornost roditelja maloljetnih počinitelaca – kada maloljetnici sudjeluju u organizovanom nasilju, roditelji moraju snositi zakonske posljedice, uključujući novčane kazne i obavezno savjetovanje.
3. Posebne policijske jedinice za navijačko nasilje – formiranje specijalizovanih timova MUP-a koji će pratiti navijačke skupine, njihove vođe i podgrupe, uz obavezno redovno izvještavanje.
4. Javna registracija vođa navijačkih podgrupa – svaka organizovana grupa koja djeluje kao "navijačka podgrupa" mora imati prijavljenog odgovornog punoljetnog vođu koji zakonski odgovara za ponašanje članova.
5. Zabrana nošenja fantomki, marama, maski i sličnih pokrivača u blizini stadiona i tokom navijačkih okupljanja, osim kada se radi o medicinskim razlozima.
6. Obavezno izvještavanje policije prema porodicama žrtava – više se ne smije dešavati da roditelji prijave napad, a da mjesecima ne dobiju ni jednu jedinu informaciju.
7. Hitno uvođenje kamera na kritične gradske tačke – mjesta gdje navijačke grupe presreću djecu i građane moraju biti pokrivena nadzorom 24/7.

ZAHTJEV INSTITUCIJAMA

Tražim da se ova inicijativa uvrsti u rad Ministarstva unutrašnjih poslova FBiH i kantonalnih MUP-ova, kao i da se održi hitna sjednica na kojoj će se raspravljati o sigurnosti mladih i eskalaciji navijačkog nasilja.

Ovo nije borba protiv navijača. Ovo je borba protiv huligana koji se kriju iza boja klubova, a zapravo teroriju djecu, roditelje i cijele zajednice.

Sve dok napad na maloljetnika bude tretiran kao "navijački sukob", a ne kao krivično djelo – biće još povrijeđene djece, još uplašeni roditelji i još suza.

Vrijeme je da se sistem probudi.

Vrijeme je da zaštitimo našu djecu.

2. PODNOSIM INICIJATIVU ZA POKRETANJE POSTUPKA IZGRADNJE AUTOBUSKOG STAJALIŠTA U RAJLOVCU.

Na pomenutoj lokaciji trenutno ne postoji adekvatno uređen prostor za čekanje autobusa, što predstavlja sigurnosni rizik, posebno u jutarnjim i večernjim satima kada se djeca vraćaju iz škole, kao i tokom loših vremenskih uvjeta.

Uređenje autobusnog stajališta doprinijelo bi:

povećanju sigurnosti pješaka i putnika,

boljoj organizaciji javnog prijevoza,

smanjenju zadržavanja putnika na kolovozu,

poboljšanju kvaliteta života stanovnika ovog dijela grada.

Molim nadležnu službu za hitno pokretanje ovog postupka.

-vijećnik Dino Okerić -

1. Pokrećem inicijativu za izmjene i dopune Pravilnika o dodjeli jednokratne novčane pomoći za troškove liječenja. Naime, nedopustivo je da se iz godine u godinu u budžetu Općine Novi Grad Sarajevo smanjuje iznos za ovu namjenu.

Građani koji imaju pravo na ovaj vid pomoći iskazuju ogromno nezadovoljstvo zato što odbijenicu dobiju sa obrazloženjem da nema dovoljno sredstava, a da oni ipak apliciraju u 2026. godini pa će uz smanjen Budžet ponovno dobiti odbijenicu.

Nemojte da se igramo sa najhrabrijim sinovima ove države, sa ljudima koji imaju najteža oboljenja, sa djecom koja imaju invaliditet 100%.

Pravo na pomoć pri liječenju nije aukcija već zakonska i ljudska obaveza lokalne zajednice.

Shodno navedenom iniciram izmjene i dopune navedenog Pravilnika te da se shodno dostavljenim vještačenjima Instituta za medicinsko vještačenje i rješenjima Centra za socijalni rad KS izradi registar pri Službi za boračka pitanja, rad, socijalna pitanja i zdravstvo i da na osnovu tih stečenih prava ostvaruju pravo na ovu pomoć po automatizmu.

Te osobe ne trebaju poniženja već ostvarivanje prava i podršku lokalne zajednice koja je u našoj općini najniža.

Takoder iniciram povećanje iznosa sa 200 KM na 1000 KM, a poređenja radi u Općini Centar ta pomoć iznosi 1500 KM.

Iniciram i povećanje budžetskog transfera prema potrebama registra jer to je minimum onoga što možemo uraditi za naše građane

2. U prethodnom mandatu je usvojena odluka o taksama u kojima su posebno tretirane kladionice pa nas interesuje da li se ta odluka primjenjuje te da li kladionice plaćaju i kako se postupa u slučaju da ne plaćaju.

3. Prijedlog na Nacrt Budžeta Općine Novi Grad Sarajevo za 2026. godinu

U članu 2. Nacrta Budžeta ekonomski kod 614200 „Tekući transfer za participaciju teško oboljelih,, uvećava se za 250.000,00 KM i treba da iznosi 400.000,00 KM.

OBRASLOŽENJE

Zbog sve veće potrebe za pružanjem pomoći teško oboljelih građana naše Općine, potrebno je povećati grant Tekući transfer za participaciju teško oboljelih.

-vijećnica Selma Alić -

1. Vijećničko pitanje

Na osnovu informacija objavljenih od strane Općine Novi Grad Sarajevo o potpisivanju ugovora između Općine i firme “Mibral” za izgradnju rezervoara za vodu “Reljevo 2”, iz kojeg će se vodom snabdijevati stanovnici naselja Rječica, molim Vas da mi dostavite informaciju:

1.U kojoj fazi se trenutno nalazi realizacija projekta izgradnje rezervoara “Reljevo 2” i pratećeg sistema gradske vodovodne mreže za naselje Rječica?

2. Kada se planira početak ili završetak radova na izgradnji kolektora za otpadne vode za naselje Rječica – Reljevo, odnosno u kojoj je fazi priprema projektne dokumentacije i realizacija tog dijela infrastrukturnog projekta?

S obzirom na važnost ovih projekata za stanovnike naselja Rječica, molim da se vijeću dostavi detaljan izvještaj o trenutnim aktivnostima, rokovima i planiranim koracima u realizaciji.

2. Inicijativa

Na osnovu potrebe za pravednijim i sveobuhvatnijim pristupom u dodjeli finansijske pomoći građanima koji se suočavaju s težim oboljenjima, podnosim inicijativu za izmjenu i dopunu Pravilnika o dodjeli finansijskih sredstava za liječenje težih oboljenja, u dijelu koji se odnosi na kategorije oboljenja i vrste pomoći koje se odobravaju.

Predlažem da se u Pravilnik uvrsti posebna tačka kojom bi se obuhvatile osobe koje su zbog zdravstvenih razloga na bezglutenskoj ishrani kao što su osobe oboljele od celijakije, te da se poveća iznos jednokratne pomoći koja ima se odobrava.

Obrazloženje

Osobe koje boluju od celijakije primorane su doživotno konzumirati isključivo bezglutenske proizvode, čija je cijena znatno viša u odnosu na standardne prehrambene namirnice. Troškovi ovakvog režima ishrane predstavljaju dodatni i stalni finansijski teret za oboljele i njihove porodice, a dostupnost proizvoda je često ograničena.

Ističem da su pojedine općine Kantona Sarajevo već prepoznale ovu problematiku i uvrstile osobe na bezglutenskoj ishrani u svoje pravilnike o dodjeli finansijskih sredstava, uz povećanje iznosa jednokratne pomoći, čime bi barem djelimično ublažile finansijski teret ovih građana.

S tim u vezi, predlažem da i Općina Novi Grad razmotri ovu inicijativu i izvrši dopunu postojećeg Pravilnika, kako bi se osobama na bezglutenskoj ishrani omogućila adekvatnija i pravednija podrška, u skladu s primjerima dobre prakse drugih općina Kantona Sarajevo.

3. Vijećničko pitanje

Zašto su već više od mjesec dana obustavljeni radovi na sanaciji dijela ulice Muftije Džabića prem ulici Vrbovska na području MZ Anex. Postavljena tabla investitora Općina Novi Grad, natpis izvođača radova i vrijeme trajanja radova 180 kalendarskih dana je sklonjena.

Radovi su počeli sredinom Jula tekuće godine i građani se pitaju čemu obustava duži period, šta kada sad dođu hladniji dani i počni padavine. Strahuju za svoju sigurnost kretanja zbog nadolazećih hladniji dana.

Također bi zatražila obrazloženje da ukoliko nije trenutno do izvođača radova ako postoji problem koje treba riješiti neko komunalno preduzeće Kantona Sarajevo da li je nadležna služba Općine uputila dopis istim za rješavanje problema i kada.

4. PRIJEDLOG IZMJENE I DOPUNE PRAVILNIKA O FINANSIJSKOJ PODRŠCI DJELOVANJA SPORTSKIH KLUBOVA – DRUŠTAVA SA SJEDIŠTEM NA PODRUČJU OPĆINE NOVI GRAD SARAJEVO

I. PRIJEDLOG DOPUNE PRAVILNIKA

U Pravilniku o finansijskoj podršci djelovanja sportskih klubova – društava sa sjedištem na području Općine Novi Grad Sarajevo (prečišćeni tekst), predlaže se uvođenje novog člana, koji glasi:

Član XX (novi)

(Posebni kriteriji za nagrađivanje sportista invalida)

1. Za sportiste invalide koji se takmiče u disciplinama koje nisu zastupljene na Paraolimpijskim igrama, a u okviru sportskih saveza ili udruženja registrovanih za osobe sa invaliditetom, najveći mogući rezultat predstavlja osvajanje naslova prvaka Bosne i Hercegovine ili Federacije Bosne i Hercegovine, te se isti boduje kao najviši rezultat u skladu sa mogućnostima takmičenja u tim disciplinama.

2. Takmičenja u sportovima: šulen, stoni tenis, ribolov, streljaštvo, šah, pikado, mali fudbal i boćanje, smatraju se takmičenjima u okviru sportskih aktivnosti osoba s invaliditetom od posebnog društvenog značaja za Općinu Novi Grad Sarajevo.

3. Način bodovanja i kategorizacije sportskih rezultata u ovim disciplinama uređuje se tako da se izbjegne bilo koji oblik diskriminacije prema sportistima invalidima u odnosu na druge sportiste.

4. Udruženje za sport i rekreaciju invalida Općine Novi Grad Sarajevo ostvaruje pravo na finansijsku podršku bez obaveze naplate članarine od svojih članova, imajući u vidu socijalni i rehabilitacijski karakter njegovog djelovanja.

5. Detaljni kriteriji bodovanja i vrednovanja sportskih rezultata sportista invalida utvrđuju se posebnim aktom koji donosi nadležna služba Općine Novi Grad Sarajevo, u saradnji sa Savezom za sport i rekreaciju invalida Kantona Sarajevo.

II. OBRAZLOŽENJE

Pravilnikom u važećem obliku nije dovoljno prepoznata činjenica da se značajan broj sportista invalida takmiči u disciplinama koje nisu zastupljene u sistemu Paraolimpijskih igara, te da su državna i entitetska prvenstva najviši oblik takmičenja koji postoji u tim sportovima. Izostanak prepoznavanja

ovih disciplina i rezultata dovodi do neposredne diskriminacije sportista invalida, jer se njihovi rezultati ne mogu vrednovati prema postojećim kriterijima, što je suprotno odredbama Zakona o zabrani diskriminacije BiH i Zakona o pravima osoba sa invaliditetom. Takođe, specifičnost rada Udruženja za sport i rekreaciju invalida Općine Novi Grad Sarajevo je u tome što ono ne naplaćuje članarinu, za razliku od drugih klubova koji ostvaruju dodatne prihode po tom osnovu. Ova praksa ima izrazit socijalni, zdravstveni i rehabilitacijski značaj, te se predloženim izmjenama želi očuvati taj pristup. Pored toga, primijećeno je da se određeni sportski klubovi formalno prebacuju na područje Općine Novi Grad Sarajevo isključivo radi ostvarivanja prava na grant sredstva, čime se narušava ravnopravnost u raspodjeli budžetskih sredstava i umanjuje podrška klubovima koji zaista djeluju i ostvaruju rezultate na području Općine. Predloženom dopunom stvaraju se uslovi za zakonitu, pravičnu i transparentnu raspodjelu sredstava, uz puno poštivanje principa jednakosti, dostupnosti sporta osobama sa invaliditetom i promociju Općine Novi Grad kao primjera dobre prakse u ovoj oblasti.

5. Vijećničko pitanje

Da li je Općinski načelnik ikada predložio na općinskom vijeću odluku o Javnom interesu na parceli 3533/1 radi donošenja Rješenja o eksproprijaciji, kako bi se završio projekat evakuacionog/požarnog puta, što je zakonska obaveza?

6. Na osnovu konsultacija sa članovima Savjeta Mjesne zajednice Otoka, podnosim sljedeću inicijativu nadležnoj službi Općine za pokretanje aktivnosti na izradi idejnog projekta za izgradnju podzemnih i etažnih garaža na području MZ Otoka

Obrazloženje inicijative:

Mjesna zajednica Otoka suočava se sa dugogodišnjim problemom nedostatka parking kapaciteta, što utiče na svakodnevno funkcionisanje stanovnika i opterećenje saobraćajnica. Postojeći parking prostori više ne mogu zadovoljiti potrebe stanovništva. Čanovi Savjeta MZ Otoka ukazali su na potrebu dugoročnog rješenja kroz izgradnju podzemnih i/ili etažnih garaža na odgovarajućim lokacijama unutar mjesne zajednice.

Predlaže se da nadležne službe:

1. Pokrenu proces izrade idejnog projekta za izgradnju podzemnih i etažnih garaža na području MZ Otoka.
2. Izvrše procjenu potrebnih lokacija, tehničkih uslova, urbanističkih mogućnosti i prostornih ograničenja.
3. Pripreme stručnu analizu i procjenu troškova, uz razmatranje fazne realizacije.
4. Razmotre modele finansiranja, uključujući javno–privatno partnerstvo i druge dostupne izvore.

Ciljevi inicijative:

- dugoročno rješavanje problema nedostatka parking prostora,
- smanjenje opterećenja saobraćajnica,
- povećanje sigurnosti i uredenosti javnih površina,
- unapređenje kvaliteta života građana MZ Otoka.

Molim nadležnu službu da razmotri inicijativu i pristupi izradi idejnog rješenja.

7. Podnosim vijećničku inicijativu prema Službi za investicije Općine Novi Grad da uz zajedničku saradnju sa KJKP „Rad“ obezbijede nove kontejnere za odlaganje komunalnog i reciklažnog otpada i postavljanje metalne konstrukcije oko kontejnera sa vratima za pristup istim na lokaciji MZ Buća Potok, tačnije na spoju ulica Adema Buće i Nusreta Prohića u blizini ambulante i dječijeg igrališta.

Obrazloženje

Činjenica jeste da nesavjesni građani nepropisno odlažu otpad, ali isto tako trenutno stanje kontejnera nije u skladu sa sanitarno higijenskim uvjetima. Postojeći kontejneri su dotrajali, sa propalim dnom pri čemu se otpad prosipa okolo, uz to je nedovoljan broj istih.

Građani predlažu postavljanje zaštitne metalne konstrukcije čime i uređenje same lokacije za odlaganje otpada.

8. Na osnovu konsultacija sa građanima Mjesne zajednice Otoka, podnosim sljedeću inicijativu prema nadležnim službama Općine, a to je regulisanje parking prostora u naselju Otoka kroz uspostavljanje jednosmjernog režima saobraćaja u ulici Brčanska (od broja 14) do ulice Žrtava fašizma (broj 2)

Predlaže se:

1. Uspostavljanje jednosmjernog režima saobraćaja u ulici Brčanska, na dionici od broja 14 do spoja sa ulicom Žrtava fašizma (broj 2).
2. Oslobađanje jedne kolovozne trake radi njenog preuređenja u označena parking mjesta.
3. Uređenje i obilježavanje parking površina horizontalnom i vertikalnom signalizacijom.

Obrazloženje inicijative:

Građani MZ Otoka duži vremenski period ukazuju na nedostatak adekvatnih parking kapaciteta, što stvara svakodnevne probleme učesnicima u saobraćaju. Dvosmjerni režim saobraćaja u dijelu ulice Brčanska dodatno otežava protočnost saobraćaja i onemogućava optimalno korištenje raspoloživog prostora.

Ciljevi inicijative:

- povećanje broja parking mjesta,
- bolja organizacija saobraćaja u mirovanju,
- povećanje protočnosti i sigurnosti u saobraćaju,
- smanjenje saobraćajnih zagušenja u naselju.

Molim nadležnu službu da razmotri inicijativu i u skladu sa nadležnostima poduzme potrebne aktivnosti.

-vijećnica Emina Hasanović-

1. Jasno označavanje autobuskih stajališta na tramvajskim stanicama

Predlažem da se jasno obilježe autobusna stajališta koja se nekada nalaze iza/ispred i nekada na tramvajskim stanicama u centru, jer su trenutno neprepoznatljiva za građane a posebno za turiste. Potrebna je vidljiva horizontalna, kako bi se spriječila konfuzija i povećala sigurnost putnika.

2. Tramvaj s prostorom za bicikla

Predlažem da uvede mogućnost prevoza bicikala u odabranim tramvajima, po uzoru na evropske gradove. Svaki peti ili deseti tramvaj mogao bi imati obilježen prostor za bicikla, te bi samo u tim tramvajima bilo moguće ući sa biciklom. Grad Sarajevo je longitudinalan, te je poznato da se iz istog razloga kretanje biciklom manje učinkovito nego u gradovima. Doprinijelo bi tome da građani Sarajeva žive zdraviji i lakši život.

3.

Tramvaj s dozvolom za prevoz kućnih ljubimaca

Predlažem da svaki 5. tramvaj bude posebno označen i omogući prevoz pasa na povocu i s brnjicom. Time bi se vlasnicima ljubimaca bez automobila omogućio pristup veterinaru i rekreativnim zonama, uz poštovanje putnika koji ne žele kontakt sa životinjama — jer bi većina tramvaja ostala standardna. Ukoliko se pokaže da je svaki peti (ili šesti) tramvaj previše ili premalo, broj bi se mogao prilagođavati prema potrebama.

Cijena karte za kućne ljubimce bila bi reducirana, u skladu s praksama u drugim državama.

4. Deponije smeća na brdu Mojmilu

Na inicijativu građana molim informacije o ekološkoj zapuštenosti brda Mojnilo, konkretno misleći na stazu koja vodi iz SOS sela ka rezervoaru Mojnilo. Trenutno je staza izrazito zaprljana i zatrpana smećem na više mjesta.

obzirom da se radi o često posjećenom prostoru od strane djece, odraslih i turista, smatram da je potrebna hitna reakcija.

5. Unapređenju tehničkih uslova za održavanje sjednica Općinskog vijeća

Molim da se dostavi informacija da li Općina Novi Grad planira preseliti sjednice Općinskog vijeća u tehnički opremljeniju salu (sa stolovima i mikrofona).

Ako takav plan ne postoji, predlažem nabavku bežičnih/prenosivih mikrofona za vijećnike.

Isto bi značajno unaprijedilo rad i kvalitet sjednica.

6. Postavljanje sfernih ogledala

U ime grupe građana iz Ulice bosanskih kraljeva, molim da se razmotri postavljanje sfernih ogledala na izrazito nepreglednom raskršću koje se na vrlo malom prostoru račva u pet pravaca. Zbog takve konfiguracije terena, kao i guste naseljenosti ulica, preglednost je otežana iz svih prilaznih strana, što stvara ozbiljan rizik za pješake i vozače.

Predlaže se postavljane dva sferna ogledala na sljedećim lokacijama:

- u neposrednoj blizini kuće na adresi Bosanskih kraljeva 11,
- te preko puta navedene kuće, na suprotnoj strani raskršća

7. INICIJATIVA 7

Postavljanje sfernih ogledala

U ime građana ulice Ramiza Salčina upućujem zahtjev za postavljanje sfernih ogledala na sljedećim lokacijama:

1. Ulica Ramiza Salčina kod broja 61 – ogledalo za potrebe stanovnika kraka ulice koji se nalazi preko puta pomenutog objekta

2. Ulica Ramiza Salčina kod broja 27 – ogledalo na izlazu iz sporednog kraka ulice

Napominjem da se u istoj ulici nalaze četiri vrtića i jedna dječija sportska sala, te da djeca svakodnevno koriste ovu trasu kao pristupnu rutu prema Osnovnoj školi “Aleksa Šantić”.

Također, pristupni krakovi izlaze na saobraćajnicu koja nema adekvatan trotoar, zbog čega se pješaci i vozila kreću istom površinom, što dodatno povećava rizik od nezgoda.

Naselje je gusto izgrađeno te je izlaz na ulicu nepregledan.

S ciljem povećanja sigurnosti djece, pješaka i vozača, molim da nadležna služba izvrši pregled lokacija i uvrsti postavljanje navedene signalizacije u što skoriji plan rada.

Unaprijed se zahvaljujem na razumijevanju i brzom postupanju.

8. Nečitkost materijala za sjednicu

U okviru materijala za sjednice Općinskog vijeća, često primamo dokumente od kantonalnih institucija, javnih preduzeća, ministarstava i drugih relevantnih pošiljalaca koji su nečitljivi ili loše skenirani.

Obzirom na to da rad vijećnika time postaje otežan, a za čitanje i analizu jednog odgovora potrebno trostruko više vremena, predlažem da služba općinskog vijeća od navedenih pošiljalaca zatraži dostavu kvalitetnijih dokumenata, po mogućnosti u PDF formatu.

Molim nadležne službe da preduzmu odgovarajuće korake.

-vijećnik Bojan Vučković-

1. Podnosim inicijativu za ulicu Nusreta Prohica zbog nepropisnog odlaganja smeća i povećanje broja kontejnera

Obrazloženje: Već duže vrijeme u ulici Nusreta Prohića, tačnije na spoju ulica Adema Buce i Nusreta Prohića, u blizini ambulante i dječjeg igrališta postoji problem, na koji stanovnici ovog dijela naše opštine upozoravaju već duže vrijeme, a to je nedovoljan broj kontejnera za odlaganje smeća kojih je sada samo četiri. Ovdje se hitno treba povećati njihov broj jer je trenutni očigledno nedovoljan za potrebe stanovnika. Osim toga na nekim od njih je dno probušeno pa smeće ispada ispod njih. Slike u prilogu. Drugi problem je odlaganje kabastog otpada. Sve skupa ovo dovodi do toga da je izgled naselja

jako ružan sa povećanim rizikom pojave zaraze i širenja bakterija. Stoga molim za hitno djelovanje kako bi se ovo katastrofalno stanje što prije popravilo.

2. Podnosim inicijativu za sanaciju staze od kafića Azzuro do prolaza prema parku i ulici Antuna Branka Šimića

Obrazloženje: Staza se nalazi u jako lošem stanju sa popucalim i dotrajalim pločama. Stazu koristi veliki broj stanovnika ovog naselja koji njom idu prema sredstvima javnog prevoza te svojim radnim mjestima, a posebno djeca na putu prema Osnovnoj školi „Osman Nakaš“. Čudi me da se ista nije obnovila kada se radila šetnica u neposrednoj blizini u Aleji Lipa te molim da se ovo ispravi kako bi se pomenuta staza što prije popravila jer u ovom stanju ona predstavlja veliki rizik od povreda a posebno u predstojećem zimskom periodu kada nam stigne i snijeg. Slike u nastavku.

3. Podnosim inicijativu za sanaciju Trga Nezavisnosti od ulice Bosanska do Geteove - Alipašino polje C-Faza

Obrazloženje: Trg Nezavisnosti se nalazi u jako lošem stanju od perioda kada su njemu mogli da pristupe automobili i dostavna vozila. Kako se i vidi na priloženim slikama, ploče su popucale sa velikim brojem oštećenja i rupa te kao takvi predstavljaju veliki sigurnosni problem posebno u predstojećim zimskim mjesecima.

Stoga u ime građana podnosim inicijativu za hitnu sanaciju popucalih ploča.

-Vijećnica Armela Humić-

Upućujem inicijativu za hitno uređenje i potpunu rekonstrukciju trotoara duž ulice Safeta Hadžića, na relaciji od Aneksa do Suda Bosne i Hercegovine.

Trenutno stanje trotoara na ovoj dionici predstavlja ozbiljan sigurnosni problem za sve pješake. Podloga je popucala, neravna, na više mjesta su vidljive duboke rupe i udubljenja zbog kojih se svakodnevno rizikuje pad i povreda. Situacija je dodatno pogoršana u zimskom periodu, kada snijeg i led zaklanjaju oštećenja, pa se građani doslovno boje napraviti korak kako ne bi slomili nogu.

Poseban problem predstavlja trolejbusko stajalište koje je u potpuno dotrajalom i neadekvatnom stanju. Beton je raspucao, površina je izlomljena, postoje otvori i pukotine koje su opasne prilikom ulaska i izlaska iz vozila. Takvo stanje je neprihvatljivo, s obzirom na to da stajalište svakodnevno koriste stotine građana, uključujući studente, radnike i službenike brojnih institucija.

Također, posebno naglašavam da je nužno urediti i dio trotoara koji vodi direktno ka Sudu Bosne i Hercegovine. Radi se o prilaznom putu jednoj od najvažnijih institucija u državi, te je neprihvatljivo da pješačka površina izgleda zapušteno, neuredno i nesigurno za kretanje. Uredan i siguran pristup Sudu BiH trebao bi biti prioritet, kako iz sigurnosnih, tako i iz reprezentativnih razloga.

Stoga molim da se pokrene postupak:

1. Kompletne rekonstrukcije i nivelacije trotoara na cijeloj navedenoj dionici.
2. Sanacije i uređenja trolejbuskog stajališta koje ve prilagođeno redovnoj upotrebi.
3. Uređenja pristupnog trotoara prema Sudu BiH kako bi se obezbijedio siguran, uredan i reprezentativan ulaz u državnu instituciju od najvećeg značaja.

Smatram da bi realizacija ove inicijative značajno doprinijela sigurnosti pješaka, kvaliteti javnog prostora i općem vizuelnom utisku ove važne gradske zone.

-vijećnica Hana Keč-

1. Upućujem inicijativu Službi za investicije i komunalne poslove Općine Novi Grad Sarajevo da se postave taktilne trake na trotoarima i javnim površinama u blizini ustanova od javnog značaja na području Općine Novi Grad Sarajevo, radi poboljšanja pristupačnosti za slijepe i slabovidne osobe.

O B R A Z L O Ž E N J E :

Slijepe i slabovidne osobe se svakodnevno suočavaju s ozbiljnim preprekama u samostalnom kretanju kroz grad, jer još uvijek ne postoji sistemska i planska instalacija taktilnih traka koje bi omogućile sigurno i samostalno kretanje. Taktilne trake omogućavaju orijentaciju putem štapa i osjetila pod nogama, te su međunarodno priznat standard u stvaranju pristupačnih gradova, a njihovo uvođenje u urbanističko planiranje je obaveza koja je definirana Uredbom o prostornim standardima, urbanističko-tehničkim uvjetima i normativima za sprječavanje stvaranja arhitektonsko-urbanističkih prepreka za osobe sa smanjenim tjelesnim mogućnostima („Službene novine FBiH“, broj 48/09). Nedostatak taktilnog navođenja na pješačkim zonama, trotoarima i ulazima u javne ustanove i institucije onemogućava osnovnu mobilnost, te predstavlja oblik pasivne diskriminacije slijepih i slabovidnih osoba. Stoga predlažem da se izradi mapa prioriternih lokacija za postavljanje taktilnih traka u saradnji s udruženjima slijepih i slabovidnih osoba, a na osnovu koje će se postaviti taktilne trake duž glavnih trotoara i na pješačkim prijelazima, kao i u okolini javnih ustanova i institucija. Realizacijom ove inicijative stvorili bismo okruženje koje je orijentisano ka inkluzivnosti, jednakim pravima i humanom urbanizmu, s jedne strane, dok bismo omogućili direktnu korist za jednu od najranjivijih grupa naših građana i građanki, s druge strane.

2. Upućujem inicijativu Službi za investicije i komunalne poslove Općine Novi Grad Sarajevo da se uspostave sigurne zone s nižim ograničenjem brzine oko svih škola i vrtića na teritoriji Općine Novi Grad Sarajevo.

O B R A Z L O Ž E N J E:

Brojne općine i gradovi se suočavaju sa svakodnevnim izazovima u oblasti saobraćajne sigurnosti, naročito kada je riječ o djeci kao najmlađim učesnicima u saobraćaju. Zbog svoje smanjene sposobnosti procjene opasnosti, niže visine i često brzih i nepredvidivih reakcija, djeca predstavljaju jednu od najugroženijih kategorija učesnika u saobraćaju, a dodatni problem predstavlja činjenica da su mnoge škole i vrtići smješteni uz saobraćajno opterećene ceste ili u naseljima gdje su brzine kretanja vozila visoke. Uzimajući u obzir navedeno, predlažem da Općina Novi Grad Sarajevo, odnosno gore navedena služba uspostavi sigurne zone u radijusu od 300 metara oko svih osnovnih škola i vrtića na gradskoj teritoriji. Sigurne zone podrazumijevaju postavljanje vertikalne i horizontalne signalizacije koja jasno označava školsku zonu, zatim fizičke mjere usporavanja saobraćaja kao što su ležeći policajci i usporivači, ograničenje brzine kretanja na maksimalno 30 km/h u radijusu od 300 metara i brzinomjer s vizuelnom povratnom informacijom koji prikazuje trenutnu brzinu vozila vozačima. Cilj inicijative je usmjeren na smanjenje rizika od saobraćajnih nesreća u blizini škola i vrtića, poboljšanje vidljivosti i sigurnosti djece pri prelasku ceste, te podizanju nivoa svijesti vozača o prisustvu djece u zoni kretanja.

-vijećnica Nejra Džanko Zukobašić -

Upućujem Inicijativu prema nadležnoj Službi Općine Novi Grad Sarajevo i KJKP „RAD“ d.o.o. vezanu za kontejnere na spoju ulica Adema Buće i Nusreta Prohića kod ambulante i dječijeg igrališta da se njihov broj poveća i da se što je moguće više uredi, očisti, jer je stanje katastrofalno i neuredno.

-vijećnik Adi Škaljić-

1. Upućujem vijećničku inicijativu za pokretanje pilot projekta sadnje tzv. „mikro šuma“ na dvije ili tri lokacije u Općini Novi Grad Sarajevo u toku 2026. godine.

O B R A Z L O Ž E N J E:

Ova inicijativa predstavlja proaktivan i inovativan pristup rješavanju urbanog zagađenja u Općini Novi Grad Sarajevo. Predlažem pilot projekat sadnje tzv. "mikro šuma" primjenom Miyawaki metode na dvije do tri strateške lokacije tokom 2026. godine, kako bismo stekli ključno iskustvo za širu implementaciju. Ove guste, autohtone zelene oaze značajno će poboljšati kvalitet zraka efikasnom apsorpcijom štetnih čestica, povećati biodiverzitet i služiti kao prirodni regulatori temperature smanjujući efekt toplotnog otoka. Projekat je troškovno efikasan, promovira zelenu tranziciju, te predviđa aktivno uključivanje građana, čime Općina Novi Grad Sarajevo postaje lider u primjeni modernih ekoloških standarda.

2. Upućujem vijećničku inicijativu za pomoć članicama i članovima Udruženja slijepih KS, sa područja naše općine pri nabavki sljedećih pomagala: bijeli štapovi; aparati za mjerenje krvnog pritiska; aparati za mjerenje nivoa šećera u krvi.

O B R A Z L O Ž E N J E:

Upućujem vijećničku inicijativu s ciljem pružanja direktne i nužne podrške članovima Udruženja slijepih Kantona Sarajevo koji imaju prebivalište na području Općine Novi Grad, prepoznajući specifične izazove s kojima se svakodnevno suočavaju. Osiguravanje bijelih štapova ključno je za održavanje njihove samostalnosti i sigurnosti prilikom kretanja, čime se direktno poboljšava kvalitet života i njihova integracija u zajednicu. Istovremeno, nabavka aparata za mjerenje krvnog pritiska i nivoa šećera u krvi predstavlja vitalnu pomoć za praćenje zdravstvenog stanja, s obzirom na to da su ove osobe često suočene s dodatnim poteškoćama u redovnim posjetama zdravstvenim ustanovama. Kroz ovu inicijativu, Općina Novi Grad Sarajevo iskazuje svoju socijalnu osjetljivost i brigu, šaljući jasnu poruku da je podrška najranjivijim kategorijama stanovništva naš prioritet. Implementacijom ove mjere, Općina ne samo da olakšava svakodnevnicu svojim slijepim i slabovidnim sugrađanima, već i ispunjava svoju etičku obavezu prema principima inkluzivnog društva.

-vijećnik Azem Cviko-

U ime građana naselja na spoju ulica Kasima Hadžića i Safeta Zajke, podnosim vijećničku inicijativu prema službi Općine Novi Grad Sarajevo, da u saradnji sa KJKP Rad i Ministarstvom saobraćaja Kantona Sarajevo izmjesti postojeće kontejnere sa trenutne lokacije uz semafor na spoju ulica Kasima Hadžića i Safeta Zajke. Potrebno je da se odredi nova lokacija za odlaganje otpada, udaljena od raskrsnice i stambenih objekata.

OBRASLOŽENJE INICIJATIVE

Na trenutnoj lokaciji, tik uz saobraćajnicu i pješačke prelaze, nalaze se kontejneri koji predstavljaju ozbiljnu prijetnju po javno zdravlje, sigurnost saobraćaja i kvalitet života stanovnika. Navodim sljedeće zabrinjavajuće činjenice:

- Pojava pacova i štetočina koje iz kontejnera ulaze u dvorišta i kuće najbližih domaćinstava, ugrožavajući zdravlje mještana, posebno djece.
- Učestalo paljenje otpada u kontejnerima, što stvara gust, otrovan dim i nepodnošljiv smrad koji se širi čitavim naseljem.
- Ostavljanje kabastog otpada, koji komunalne službe ne odvoze redovno, pretvarajući lokaciju u divlju deponiju.
- Kontejneri su postavljeni na kantonalnoj cesti, tačno ispred semafora, bez ikakvog proširenja ili sigurnosnog prostora, što dovodi u pitanje zakonitost ovakvog postavljanja.
- Pri pražnjenju kontejnera, kamioni KJKP Rad blokiraju raskrsnicu, značajno smanjuju preglednost i ugrožavaju sve učesnike u saobraćaju. Ko će biti odgovoran ako dođe do nesreće?

Građani su s pravom zabrinuti, ogorčeni i traže hitnu reakciju nadležnih.

-vijećnik Mirza Memišević-

1. Inicijativa za označavanje parking mjesta za uposlenike OŠ Aneks

Tražim da nadležna općinska služba izvrši označavanje parking mjesta iznad Osnovne škole Aneks i postavljanje odgovarajuće saobraćajne signalizacije kojom bi ta mjesta bila rezervisana za uposlenike škole u periodu trajanja nastave.

Ovo bi osiguralo uređen parking prostor i smanjilo saobraćajni pritisak u zoni škole.

2. Inicijativa za uvođenje druge smjene u ambulanti porodične medicine – Alipašino Polje C faza
Tražim da se u saradnji s Domom zdravlja Novi Grad arajevo razmotri mogućnost uvođenja druge smjene u ambulanti porodične medicine u C fazi, koja trenutno ima preko 2.600 registrovanih kartona. Nedostatak druge smjene dovodi do gužvi, produženog čekanja i ograničenog pristupa zdravstvenim uslugama.

3. Zahtjev za dostavu tačnog broja vozila za odvoz otpada (dopuna prethodnog odgovora)
Tražim da KJKP „RAD“ dostavi precizan broj vozila koja se koriste za odvoz komunalnog otpada na području Općine Novi Grad Sarajevo.

U prethodnom odgovoru nisu dati brojevi podaci, što je neophodno za analizu kapaciteta i planiranje unapređenja sistema odvoza otpada.

4. Inicijativa za hitnu ugradnju dva ležeća policajca – ul. Smaila Šikala / Senada Spahića
Tražim da nadležna služba pokrene postupak postavljanja nepodnošljivih usporivača saobraćaja u blizini raskrsnice ulica Smaila Šikala i Senada Spahića.

Stanovnici prijavljuju da se na ovoj lokaciji vozi velikom brzinom, evidentni su ponovljeni saobraćajni udesi, a ranije je zabilježena i smrt pješaka.

Hitne mjere su potrebne radi zaštite pješaka i smanjenja rizika od novih nesreća.

5. Zahtjev za informaciju o provedenim aktivnostima iz dokumenta o sigurnosti učenika (dokument, decembar 2021.)

Tražim da Služba za investicije i komunalne poslove dostavi pregled što je do sada urađeno na unapređenju sigurnosti učenika u saobraćaju, u odnosu na dokument:

„Sigurnost učenika u saobraćaju od kuće do škole sa posebnim osvrtom na OŠ ‘Aleksa Šantić’“ – decembar 2021.

Potrebno je navesti realizovane aktivnosti, nerealizovane aktivnosti uz razloge, te planove i rokove za dalje mjere.

6. Inicijativa za uređenje prostora za kontejnere – Prvomajska ulica (iza broja 33)

Tražim da nadležna općinska služba, u saradnji s KJKP „RAD“, izvrši uređenje i fizičko odvajanje prostora za kontejnere u Prvomajskoj ulici, iza broja 33.

Zbog parkiranih vozila kontejneri se ne mogu izvući do kamiona, pa se trenutno drže izvan nadstrešnice.

Predlažem postavljanje barijere (zidić ili stubovi) kako bi se osigurao pristup kontejnerima i uredilo odlaganje otpada.

7. Inicijativa za pravilno obilježavanje parking mjesta za osobe sa invaliditetom – Prvomajska ul., iza broja 33

Tražim da nadležna općinska služba jasno obilježi parking mjesto za osobe sa invaliditetom u Prvomajskoj ulici, iza broja 33.

Iako je postavljen saobraćajni znak, nema horizontalne signalizacije, pa se vozila parkiraju na mjestu predviđenom za osobe sa invaliditetom.

Potrebno je iscrtati propisane linije i simbol.

8. Inicijativa / zahtjev za dostavu preciznog broja vozila i mehanizacije za zimsko održavanje KJKP „RAD“

Tražim da KJKP „RAD“ d.o.o. Sarajevo, putem nadležne općinske službe, dostavi tačan i jasan broj vozila i mehanizacije koja se koriste za zimsko održavanje saobraćajnica na području Općine Novi Grad Sarajevo.

U prethodnom odgovoru navedeni su tipovi vozila, oprema i organizacija rada, ali nije dostavljen osnovni i ključni podatak – koliko vozila i mašina je operativno i raspoloživo za čišćenje snijega.

S obzirom na to da je sa prvim padavinama evidentno da brojne ulice ostaju neočišćene, trotoari neprohodni, a građani prepušteni sami sebi, precizan podatak o broju vozila od suštinskog je značaja za procjenu kapaciteta, planiranje intervencija i odgovorno upravljanje zimskim održavanjem.

Tražim da se u odgovoru navede:

1.Ukupan broj operativnih vozila i mašina predviđenih za zimsko održavanje.

2.Broj vozila raspoređenih na područje Općine Novi Grad.

3.Broj vozila koja su trenutno u funkciji i broj neispravnih vozila (ako ih ima).

9. Inicijativa za uklanjanje divlje deponije i pojačan nadzor – Švrakino Selo (Sulejmana ef. Musića 2)

Tražim da nadležna općinska služba, u saradnji s KJKP „RAD“, komunalnom inspekcijom i eko policijom, hitno ukloni divlju deponiju u ulici Sulejmana ef. Musića 2, u neposrednoj blizini PU Novi Grad.

Građani su prijavili da se otpad ponovo odlaže na isto mjesto, uključujući i današnji slučaj u kojem je, prema navodima komšija, otpad donesen iz zgrade Prvomajska 47.

Potrebno je osigurati:

1.hitno čišćenje lokacije,

2.pojačan nadzor eko policije,

3.bolju koordinaciju s policijom i komunalnim službama radi sprječavanja ponavljanja.

SEKRETAR
OPĆINSKOG VIJEĆA

Elvir Kosovac, dipl. pravnik

DOSTAVITI:

1. Naslovu
2. Predsjedavajući Općinskog vijeća
3. a/a